

## Pol da Pilimon do Papia Mandagit

*But piso gen*

Pilimon unun man bini tonj amin kinda. Unun Kolosi kokup pap dakon Yesu yolyol amin kinda. Oman monjini kinda mani Onesimus unun amin madepni yipmanj degek pasal kinj kokup kindakon egipgut. Unun kokup papmon Onesimus Pol anjalon anek Yesu yolyol amin dagagit.

Unun bisapmon Pol dam tebanon egipgut, do Pilimon aripmi dima kinj kosak. Mani on papia mandanj Onesimus do iban madepnikon anjigit. Rom dakon gen teban da oman monji kinda pasal kisak kanj, madepni da tagi anjakban kimotjak do yosok. Mani unun papiagwan Pol da Pilimon oman monjini tebai dima iyisak do mandagit. Oman monjini unun Yesu yolyol amin kili dagak, do notnosi yanjon da abidosak.

*Pilimon dakon oman monji pasal kigit da don Yesu yolyol amin daganban, Pol da yabekban tobil ae Pilimon do kigit*

<sup>1</sup> Nak Pol, Yesu Kristo yoldat do anek dam tebanon egisat. Nak gat ae notnin Timoti, nit da papia on Pilimon gak do mandamak. Gak notnin tagisi ae pi isalnin. <sup>2</sup> Nit papia on saminin Apia kisi do mandamak. Ae Akipus Yesu do anek yokwi pabinj yop do nin gat kalonji emat amanj ununyo

kisi do mandamak. Ae pañmuwukbi Pilimon gak da yutnon muwuk muwuk aņ unun kisi do mandamak. <sup>3</sup> Nit Piņkop Datnin, ae Amin Tagi Yesu Kristo, unun da nandan yawot aņ daminek butji paņyawot aban yawori tosak do bisit amak.

*Pilimon dakon aņpakni tagisi do Pol but galaksi nandagit*

<sup>4</sup> Bisapmi bisapmi bisit asaron, nak gak do nandanek Piņkopno ya yaņ iyisat. <sup>5</sup> Nido, toktogisi amin da yaņ nayan, gak Amin Tagi Yesu nandan gadan imiņ kimokdol, ae Piņkop dakon miņat aminyo but dasi galak taņ yomiņ kimokdol. <sup>6</sup> Piņkop da gak aņpulugaņban yipmaņ deri mini miņat aminyokon Yesu do nandan gadat asal unun yaņ tenņok abi do Piņkop bisit iyisat. Yaņ aņaki Kristo da yo morap tagisi nimisak unun do pakyaņsi nandaki. <sup>7</sup> Not, gak Piņkop dakon miņat aminyo morap but dasi galak taņ yomiņ kimagek butni paņteban asal. Yaņ aņaki unun da kisik kisik madepsi namiņakwan butno yaworisi tosak.

*Pilimon da Onesimus notnosi yaņon da abidosak*

<sup>8</sup> Yo kalonisi kindi abi do nandisat. Kristo da manon unun si abi do nak da tebai tagi gayiken. Mani, aņpak tagisi asal unun nandisat, <sup>9</sup> do gen tebai dima gayiken. Amin do but dasi galak taņ yomyom aņpak da nit kisi timikdak, do nak gen yaworisok gayiken. Nak Pol, Yesu Kristo dakon gen yaņ tenņok asat, ae Kristo dakon pi unun do aņek dam tebanon egisat. <sup>10</sup> Monjino Onesimus do aņpak tagisi aņ ibi do gayisat. Dam tebanon egapbo

Onesimus nagon apgut bisapmon, nak da Kristo bamisi nandan gadan injak do anpulgagam. Do unun monjinosi yombem agit. <sup>11</sup> Kalip gak anpulgok do pi tagi dima agit. Mani abisok pi tagisi anek gak gat ae nak gat kisi tagisi anpulgokdisak.

<sup>12</sup> Abisok yabekgo nak dakon but gat kisi gagon tobil obisak. <sup>13</sup> Abisok Gen Bin Tagisi yan tenjenok dakon pi do anek dam teban amin egisat bisapmon abidoko gak da tamokon pi asak kan, nak unun do tagisi nandaken. <sup>14</sup> Mani gak dakon yan dagok dima kanek yo kinda dima aben. Gak da idon egek nak anpulgusak do nandisal kan unun gak dakon galak tok. Nak tebai dima gayiken. <sup>15</sup> Asi, Onesimus bisap pisipmisok gepman dekgit. Mani yo unun noman tan imgut, unun gak da yokwikon nan ae abidanbi gak gat toktogisi egipjil do bo noman tagit. <sup>16</sup> Abisok unun gak dakon oman monjigin dima. Asi unun gak dakon oman monjigo egisak, mani abisok gak dakon notgosi dagak do but dasi galak tan ibi. Naga koko notnosi aban but dasi abidosot. Mani nandisat, gak da but dasi galak tan imin kimotdisal. Oman monji pini aban kan galaktokdisal, ae Kristo do anek gak da kanbi notgosi anakwan but dasi galak tan imin kimotdisal.

<sup>17</sup> Do Kristo da pikon nit kalonisi ekwamak yan kosol kan, nak opbo but dasi nian abidanbim, Onesimus do yan gin abi. <sup>18</sup> Gagon gulusun di agit, bo ae gagon goman di agit kan, mani kulabik anek unun gomanon nak dakon man mandaki. <sup>19</sup> Nak Pol da naga dakon kisit da papia on mandisat. Nak da naga goman unun sopben. Mani nandaki! Nak da gen bami gayiko nandan gadat agil, do gak

nagon gomango ton. Goman unjun gaga dakon egip egipgo. Mani unjun do dima yoken. <sup>20</sup>Not, nandaki. Amin Tagi da manon gak anpak tagi on nak do abi do nandisat. Nit Yesu Kristo dakon amin ekwamak do unjun anpak anek nak dakon but anteban abi.

<sup>21</sup> Papi on mandanek yanji nandisat, gak da nak dakon gen on guramitdisal. Nak nandisat, Onesimus do anpak akdisal, unjun da anpak abi do gayisat unjun yapdisak.

<sup>22</sup> Ae nak gen kinda gat tosok. Nak Pin kop da ji dakon bisit nandakdisak, anek nak nepban jikon tobil apdisat yanji nandan gadasat. Do yutgokon yut buri kinda nak da pokgen do anoman abi.

*Pol dakon pi isalni da Pilimon do gildatni tagi yipman iman*

<sup>23</sup> Epapras da gildat tagi yan gayisak. Unjun kisi Yesu Kristo do anek dam tebanon ekwamak.

<sup>24</sup> Nak dakon pi isalno, unjun Mak, ae Aristakus, ae Demas ae Luk unjunyo kisi da gildat tagi yan gayan.

<sup>25</sup> Amin Tagi Yesu Kristo dakon nandan yawot da ji dakon wup gat egipjak do bisit asat.

**PIN<sup>K</sup>OP GEN**  
**The New Testament and Psalms in the Yopno Language**  
**of Papua New Guinea**  
**Nupela Testamen na Buk Song long tokples Yopno long**  
**Niugini**

copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

---

PDF generated using Haiola and XeLaTeX on 22 Feb 2024 from source files dated 31 Aug 2023

b683ce50-d820-5bfc-8471-d8ee080be106